

ПРАВДА РОСЬКАЯ

1. Оубъеть моуж(ь) моужа, томъститъ братоу брата, или с(ы)н(о)ви о(т)ца, либо о(т)цю с(ы)на, или братоу чадоу, либо сестриноу с(ы)н(о)ви; аще не боудеть кто мьста, то 40 гривенъ за голову; аще боудеть роусинъ, либо гридинъ, либо коупчина, либо абетникъ, либо мечникъ, аще изъгои боудеть, либо словенинъ, то 40 гривенъ положити зань.

2. Или боудеть кровавъ или синь надъраженъ, то не искати емоу видока ч(е)л(овѣ)коу томоу; аще не боудеть на немъ знаменїа никотораго же, толи приидеть видокъ; аще ли не можетъ, тоу томоу конецъ. Оже ли себе неможетъ мьстити, то взати емоу за обиду 3 гривнѣ, а лѣтцю мзда.

3. Аще ли кто кого оударить батогомъ, либо жердью либо пастью, или чашею, или рогомъ, или тылеснїю, то 12 гривнѣ; аще сего не постигнуть, то платити емоу, то тоу конецъ.

4. Аще оутнетъ мечемъ, а не вынемъ его, либо роукоаѣтью, то 12 гривнѣ за обиду.

5. Оже ли оутнетъ роукоу, и ѿпадетъ роука, либо оусохнетъ, то 40 гривенъ.

6. Аще боудеть нога цѣла, или иачьнетъ храмати, тогда чада смиратъ.

7. Аще ли перстъ оутнетъ которыи либо, — 3 гривны за обиду.

8. А во оусѣ 12 гривни; а въ бородѣ 12 гривнѣ.

9. Оже ли кто вынезь мечъ, а нетнетъ, то тѣи гривноу положитъ.

10. Аще ли ринеть моужь моужа, либо ѿ себе, либо к собѣ, — 3 гривнѣ, а видока два выведеть; или боудеть варагъ, или колбагъ, то на ротоу.

11. Аще ли челядинъ съкрыетса, либо оу варага, либо оу кольбага, а его за три дни не выведоутъ, а познають ивъ третїи д(е)нь, то изымати емоу свои челядинъ, а 3 гривнѣ за обиду.

12. Аще кто поѣдетъ на чюжемъконѣ, не прошавъ его, то положити 3 гривнѣ.

13. Аще поиметь кто чюжь конь, либо ѿроужїе, либо портъ, а познаетьвъ своемъ мироу, то взати емоу свое, а 3 гривнѣ за обиду.

14. Аще познаеть кто, не емлетъего, то не рци емоу: „мое“; нъ рци емоутако: „пойди на сводъ, гдѣ еси взалъ“; или не поидеть, то пороучника за пѣть днїи.

15. Аже гдѣ възыщеть на друузѣпроче, а ѿн сѧ запирати почнетъ, то ити емуна изводъ пред(ъ) ч(е)л(овѣ)ка, да аще боудеть обидѧ не вдаль боудеть достоинно емоу свои скоть, а за обиду 3 гривнѣ.

16. Аще кто челадинъ поати хоцетъ, познавъ свои, то къ ономоу вести, оу кого то боудеть коупиль, а тои сѧ ведеть ко друугомоу, даже доидеть до третього, то рци третьемоу: „вдаи тымнѣ свои челадинъ, а ты своего скота ищи при видоцѣ“.

17. Или холопъ оударить свободна моужа, а бѣжить въ хоромъ, а г(осподи)нъ начнетъ не дати его, то холопа поати, да платитъ г(осподи)нъзанъ 12 гривнѣ; а за тымъ, где его налѣзоуть оудареныи тои моужъ, да бьютъ его.

18. А иже изломить копье, любо щить, любо портъ, а начнетъ хотѣти его деръжати оу себе, то прѣати скота оу него; а иже естъ изломилъ, аще ли начнетъ примѣтати, то скотомъ емоу заплатити, колько далъ боудеть на немъ.

Правда оуоставлена Роуськои земли, егда сѧ съвокоупиль Изаславъ, Всеволодъ, С(вѧ)тославъ, Косначко, Перенѣгъ, Микыфоръ, Кыанинъ, Чюдинъ, Микоула.

19. Аще оубьютъ огнищанина въ обиду, то платити занъ 80 гривень оубици, а людемъ не надобѣ; а въ подѣздномъ кнажи 80 гривень.

20. А иж(е) оубьютъ огнищанина в разбои, или оубица не ицоуть, то вирное платити в неи же вири голова начнетъ лежати.

21. Аже оубиютъ огнищанина оуклѣти, или оу конѧ или оу говада, или оу коровѣ татьбы, то оубити въ ѡа мѣсто; а то же поконъи тивоуницоу.

22. А въ кнажи тивоунѣ 80 гривень.

23. А конюхъ старьи оу стада 80 гривень, æко оуоставилъ Изаславъ въ своем конюсѣ, его ж(е) оубилѣ Дорогобоудъци.

24. А въ сельскомъ старостѣ кнажи в ратаннѣмъ 12 гривнѣ, а в радовници кнажѣ 5 гризень.

25. А въ смердѣ и въ холѣ 5 гривень.

26. Аще роба кормилица, любо кормиличицъ — 12.

27. А за кнажъ конь, иже тои с пятномъ 3 гривнѣ; а за смердѣи 2 гривнѣ, за кобылоу 60 рѣзанъ, а за волъ гривноу, а за коровоу 40 рѣзанъ, а третьæкъ 15 коунъ, а за лоньщиноу польгривнѣ, а за телѧ 5 рѣзанъ, за Арѧ ногата, за боранъ ногата.

28. А оже оуведеть чюжь холопъ любо робоу, платити емоу за обиду 12 гривнѣ.

29. Аще же прѣидеть кровавъ моужъ любо синь, то не искати ему послоуха.

30. А иже крадетъ любоконъ, любо волы, или клѣтъ, да ащебоудеть единъ краль, то гривноу и тридесѧтьрѣзанъ платити емоу; или ихъбоудеть, то по трѣ гривнѣ и по 30 рѣзанъ платитѣ моужеви.

31. А въ кнажѣ борти 3 гривнѣ, любо пожгоуть любо изоудроуть.

32. Или смердъ оумочать, абезъ княжа слова, за обиду 3 гривны; а въ гнищанїнѣ, и в тивоуницѣ, и въ мечници 12 гривнѣ.

33. А иже межоу переоретьлюбо перетесь, то за обиду 12 гривнѣ.

34. А оже лодью оукрадетъ, то за лодью платити 30 рѣзанъ, а продажирѣ 60 резанъ.

35. А въ голоубѣ и въ коурати 9 коунъ; а въ оуткѣ, и въ гоусѣ, и въ жеравѣ, и въ лебеди 30 рѣзанъ, а продажи 60 рѣзанъ.

36. А оже оукрадоутъ чюжь песъ, любо æстребъ, любо соколь, то за обиду 3 гривны.

37. Аще оубьютъ тата на своемъ дворѣ, любо оуклѣти, или оухлѣва, то тои оубить; аще ли досвѣта держать, то вести его на княжъ дворъ, а оже ли оубьютъ, а люди боудоутъ видѣли свазанъ, то платити в немъ.

38. Оже сѣно крадоутъ, то 9 коунъ; а въ дровехъ 9 коунъ.

39. Аже оукрадоутъ овъцоу или козоу или свинью, а ихъ боудеть 10 одиноу овъцоу оукралѣ, да положить по 60 рѣзанъ продажи; а хто изималъ, томоу 10 рѣзанъ.

40. А ѿ гри(в)не мечникоу коуна, а в девятиноу 15 коунъ, а князю 3 гривны; а ѿ гривноу емъцю 70 коунъ, а в десятиноу 2 гривнѣ, а князю 10 гривенъ.

41. А се поклонъ вирнии: вирникоу взати вѣдоръ солодоу на недѣлю, тѣ ж(е) ѡвенъ, любо полоть, или двѣ ногатѣ; а въ сред(у) рѣзаноу вѣтри же сыры, в патницоу тако же; а хлѣба по колькоу моугоутъ ѡсти и пшена; а куръ по двое на д(е)нь; конѣ поставити и соути имъ на ротъ колькогоутъ зобати; а вирникоу 60 гривенъ и 10 рѣзанъ и 12 вѣверици; а передѣ гривна, или са пригоди в говѣнїе рьбами, то взати за рыбы 7 рѣзанъ, — тѣ всѣхъ коунъ 15 коунъ на недѣлю, а борошна колько моугоутъ изъѡсти; до недѣли же вироу збероутъ вирници. То ти оурокъ Ѧрославль.

42. А се оурокъ мостьниковъ: аще помостивше мостъ, взати ѿ дѣланогата, а ѿ городници ногата; аще жебоудеть ветхаго моста потвердитї нѣколико доскъ, или 3, или 4, или 5, то тоеже.